

<http://www.mojportal.ba/novost/198429/I-smrt-je-postala-luksuz-Za-ukop-potrebno-najmanje-2.000-KM>



Jedan od sagovornika agencije Patria, koji zbog prirode posla kojeg obavlja nije mogao otkriti identitet, kazao je da se građani u Istočnom Sarajevu sve češće kopaju i sahranjuju na kredit, jer su cijene ovih usluga za mnoge od njih previsoke, zbog njihove niske platežne moć

Visoka cijena za naš standard

I smrt je postala luksuz: Za ukop potrebno najmanje 2.000 KM

Objavljeno 08.09.2014 u 13:58

Najjeftinija sahrana u Istočnom Sarajevu košta između 1.200 i 1.500 KM, plus ručak za dušu umrlog koji košta skoro koliko i cijela sahrana, piše bh. novinska agencija Patria (NAP).

Jedan od sagovornika agencije Patria, koji zbog prirode posla kojeg obavlja nije mogao otkriti identitet, kazao je da se građani u Istočnom Sarajevu sve češće kopaju i sahranjuju na kredit, jer su cijene ovih usluga za mnoge od njih previsoke, zbog njihove niske platežne moći.

'Naročito visoke cijene građani plaćaju za običaje prilikom sahrana. Recimo, sam ručak nakon sahrane košta koliko i sama sahrana', objasnio je ovaj sagovornik.

'Jedno grobno mjesto u Istočnom Sarajevu košta oko 750 KM, najeftiniji sanduk je oko 250 KM. Ljudi se uglavnom sahranjuju po vjerskim obredima pa tu imate još i troškove sveštenika, korištenje kapele... Sve to skupa košta između 1.200 i 1.500 KM. No, skoro da toliko košta i ručak nakon sahrane, koji nije ništa drugo do narodni običaj. Porodicama pokojnika to predstavlja veliko

finansijsko opterećenje, mnogi od njih posuđuju novac od prijatelja ili u bankama kako bi sahranili svoje umrle', kaže on.

Visoke cijene ukopa i dženaza su i u glavnom gradu Bosne i Hercegovine. Najjeftiniji ukop u Sarajevu također prelazi 1.000 KM. Primjerice, najjeftinije je na groblju Vlakovo gdje je za ukop i dženazu posebno izdvojiti 1.950 KM.

Građani će bolje proći jedino ako su članovi nekog od pogrebnih društava. U Sarajevu ih ima četiri: Pogrebno društvo Sv. Anto, Sv. Marko, Jedileri i Bakije. Mjesečna članarina za ova društva košta između 4 i 6 KM. Prednost članova ovih pogrebnih društava je u tome da kada osoba umre, udruženje za njih plaća kompletnu sahranu. Ako osoba želi ukop po vjerskim običajima, tokom života mora biti i član vjerske zajednice. Godišnja članarina u Islamskoj zajednici BiH u Sarajevu košta 45 KM.

'Trebalo bi znati da postoji razlika kod pristupa članstvu pokopnim društvima. Za one koji nisu navršili 50 godina starosti članstvo je šest KM, koliko košta i mjesečna članarina. Za ljude između 50 i 55 godina starosti, pristupna članarina je 300 KM, za one starije od 55 godina to je 600 KM... Također, da bi ostvarili pogodnosti udruženja, morate biti naš član najmanje tri godine', kažu iz Katoličkog pogrebnog udruženja Sv. Anto.

'Zbog toga je veoma važno da se ljudi počnu mladi učlanjivati u pogrebna društva, sve to im se isplati na kraju. Ukoliko nisu članovi nekog od pogrebnih društava, ukopi su za većinu građana dosta skupi', govore iz ovog udruženja, piše NAP.

(NAP/MOJportal)